

Pencapaian 2019 pemangkin Selangor lakar kejayaan tahun ini

SelangorKini.my

01 Januari 2020

by Afix Redzuan

SHAH ALAM, 1 JAN: Pencapaian luar biasa Selangor sepanjang 2019 menjadi pemangkin buat Kerajaan Negeri untuk melakar pelbagai kejayaan tahun ini.

Dato' Menteri Besar, Dato' Seri Amirudin Shari berkata beberapa agensi berjaya mencapai prestasi cemerlang termasuk dua pejabat daerah dan tanah, dua badan berkanun, dua jabatan serta tujuh pihak berkuasa tempatan.

“Selangor menutup tirai tahun ini dengan beberapa pencapaian luar biasa. Kesemua 13 jabatan menunjukkan gerak kerja sangat baik dan melaksanakan tugas dengan amanah serta berintegriti.

“(Kejayaan ini menyaksikan) kita mendapat pengiktirafan daripada Jabatan Perkhidmatan Awam serta Suruhanjaya Pencegahan Rasuah Malaysia,” katanya dalam Perutusan Tahun Baharu 2020.

Amirudin berkata kemanisan hasil pelaburan berjumlah RM16.4 bilion yang diperoleh melangkaui sasaran RM10 bilion, membuktikan visi Selangor Negeri Pintar Utama Serantau berada dalam genggaman.

Pada 2018, Selangor berjaya mencatatkan pelaburan terbesar sepanjang 30 tahun dengan jumlah RM18.9 bilion.

© Copyright 2019 - Developed for the People of Selangor

Source: <https://selangorkini.my/2020/01/pencapaian-2019-pemangkin-selangor-lakar-kejayaan-tahun-ini/>